

Nodiadau Eglurhaol

Gorchymyn Gwarchod Mannau Cyhoeddus Rheoli Alcohol

Mae Cyngor Sir y Fflint yn lansio ymgynghoriad ar gynlluniau i ymestyn Gorchymyn Gwarchod Mannau Cyhoeddus sy'n ymwneud â mesurau rheoli alcohol ar dir cyhoeddus.

O ddechrau mis Hydref 2023 mae disgwyl y bydd Gorchymyn Gwarchod Mannau Cyhoeddus mewn cysylltiad â rheoli alcohol yn weithredol ar draws Sir y Fflint ac yn ymestyn y gorchymyn presennol er mwyn helpu i fynd i'r afael ag ymddygiad gwrthgymdeithasol oherwydd alcohol mewn mannau cyhoeddus yn Sir y Fflint.

Pam cyflwyno Gorchymyn Gwarchod Mannau Cyhoeddus?

Mae mwyafrif y bobl sy'n yfed alcohol mewn mannau cyhoeddus yn ymddwyn mewn modd cyfrifol, ond nid yw lleiafrif bychan yn ymddwyn yn gyfrifol ac maent yn cyflawni ymddygiad gwrthgymdeithasol. Trwy ymestyn y Gorchymyn Gwarchod Mannau Cyhoeddus yma, bydd gan yr Heddlu bwerau i ymyrryd yn gynnar os bydd y rhai sydd yn yfed alcohol mewn man cyhoeddus yn dechrau bod yn niwsans.

Beth fydd y gorchymyn arfaethedig yn ei olygu?

Effaith y Gorchymyn yw gosod y gwaharddiadau a/neu ofynion canlynol mewn mannau cyhoeddus yn Sir y Fflint, drwy'r amser:-

- (a) mae unrhyw berson sydd, heb esgus rhesymol, yn parhau i yfed diod feddwol mewn man cyhoeddus o fewn Ardal y Cyfyngiad pan fydd swyddog awdurdodedig yn gofyn iddo beidio, yn cyflawni trosedd.
- (b) mae unrhyw berson sydd, mewn man cyhoeddus o fewn Ardal y Cyfyngiad, heb esgus rhesymol, sy'n methu ag ildio unrhyw ddiod feddwol sydd yn eu meddiant pan fydd swyddog awdurdodedig yn gofyn iddo beidio, yn cyflawni trosedd.
- (c) mae'n rhaid i swyddog awdurdodedig sy'n gosod gofyniad o dan Erthygl 4(a) ac/neu 4(b) uchod ddweud wrth y person fod methu â chydymffurfio â'r gwaharddiad ac/neu'r gofyniad, heb esgus rhesymol, yn drosedd.

Ar ba dir y bydd hyn yn berthnasol?

Yr Ardal Gyfyngedig yw unrhyw fan cyhoeddus yn Sir y Fflint. Ystyr man cyhoeddus ydi unrhyw le awyr agored y gall y cyhoedd neu ran o'r cyhoedd ei ddefnyddio, ar ôl talu neu fel arall, fel hawl neu yn dilyn caniatâd penodol neu ymhlyg.

Ydi hyn yn berthnasol i dir nad yw'n eiddo i Gyngor Sir y Fflint?

Ni fydd gorfodi'n digwydd ar dir preifat, ond fe all yn y dyfodol, os oes digon o gwynion ac ar ôl ymgynghori gyda'r perchennog tir perthnasol.

Pa gamau allaf i eu cymryd i sicrhau fy mod yn cydymffurfio â'r Gorchymyn, oes modd i mi yfed alcohol mewn man cyhoeddus?

Nid yw'r gorchymyn yn eich atal rhag yfed alcohol mewn man cyhoeddus yn Sir y Fflint. Er mwyn cydymffurfio â'r gorchymyn, mae'n rhaid i chi ymddwyn mewn modd cyfrifol a pheidio â chreu niwsans cyhoeddus os byddwch chi'n yfed alcohol mewn man cyhoeddus.

A fydd yna unrhyw eithriadu ar gyfer unigolion sydd â nodweddion a ddiogelir?

Bydd Cyngor Sir y Fflint yn sicrhau bod y Gorchymyn Gwarchod Mannau Cyhoeddus yn cydymffurfio â'r Ddeddf Cydraddoldeb, a bydd yn llenwi Asesiad o Effaith ar Gydraddoldeb cyn y bydd unrhyw orchymyn cael ei orfodi. Dylai unrhyw eithriadau ar gyfer unigolion gyda nodweddion a ddiogelir gael eu cynnwys yn y gorchymyn terfynol.

Gorfodi

Beth sy'n digwydd os nad ydw i'n cydymffurfio ag unrhyw ran o'r Gorchymyn?

Os na fydd yr unigolyn sydd yn yfed alcohol mewn man cyhoeddus yn cydymffurfio â gofynion y gorchymyn, fe fyddent yn cyflawni trosedd oni bai fod ganddynt reswm rhesymol dros beidio â chydymffurfio, neu eu bod yn cael eu heithrio o'r gorchymyn, megis unrhyw eithriad o dan y Ddeddf Cydraddoldeb.

Rhaid cyflwyno digon o dystiolaeth i brofi bod trosedd wedi digwydd y tu hwnt i amheuaeth resymol cyn y gellir gweithredu.

Allaf i gael Rhybudd Cosb Benodedig?

Gallwch, gellir rhoi rhybudd cosb benodedig i unigolyn sydd yn torri'r gorchymyn hwn, gan gynnig cyfle iddynt ddileu eu hatebolrwydd i gael eu herlyn drwy dalu dirwy o £75.

Erbyn pryd y mae angen talu'r gosb benodedig?

Rhaid talu'r ddirwy o fewn 14 diwrnod o'r dyddiad y caiff y tocyn ei roi.

Beth sy'n digwydd os nad ydw i'n talu fy nghosb benodedig?

Os na fyddwch chi'n talu'r rhybudd cosb benodedig o fewn y cyfnod a ganiateir, mae'n debygol y byddwch chi'n cael eich erlyn yn y llys ynadon.

Beth yw'r ddirwy uchaf am dorri'r gorchymyn?

Mae person a geir yn euog o'r tramgwydd yn y llys ynadon yn atebol ar gollfarn ddiannod i ddirwy nad yw'n uwch na lefel 3 ar raddfa safonol y Llys (£1000 ar hyn o bryd).

Rhaid i'r amgylchiadau basio'r cod tystiolaethol llawn a rhaid iddo fod er budd y cyhoedd cyn y caiff Rhybudd Cosb Benodedig ei roi neu cyn erlyn.

Pwy fydd yn gorfodi'r Gorchymyn Gwarchod Mannau Cyhoeddus?

Heddlu Gogledd Cymru fydd yn gorfodi'r gorchymyn.

Sut fydd y cyhoedd yn gwybod bod gorchymyn yn weithredol mewn lleoliad penodol?

Fe fydd yna ddigon o arwyddion wedi'u marcio'n glir mewn lleoliadau lle fydd y gorchymyn mewn grym.

Am faint fydd y gorchymyn yn para?

Bydd y gorchymyn yn para am gyfnod o 3 blynedd, ond fe all y Cyngor ei ymestyn os ydyw'n credu fod angen. Os bydd y gorchymyn yn cael ei amrywio neu ei ymestyn mewn unrhyw ffordd, bydd cyfnod o ymgynghori'n cael ei gynnal i geisio barn y cyhoedd ac unrhyw fudd-ddeiliaid perthnasol.

Pam fod y Gorchymyn mewn grym?

Credir bod y Gorchymyn Gwarchod y Cyhoedd arfaethedig yn ymateb teg i ymdrin mewn modd mesuradwy â'r problemau presennol sydd yn y Sir. Mae gorchymyn o'r fath yn angenrheidiol ac yn gymesur o ran rheolau y mae'n eu gosod ac nid yw wedi'i ddylunio i wahaniaethau yn erbyn pobl sydd yn dymuno gallu yfed alcohol y tu allan yn dawel heb achosi aflonyddwch.